

# **Акафист преподобной Евфросинии Полоцкой**

*Память празднуем 5 июня (23 мая)*

## ***Кондак 1***

Избранную Христову невесту песньми восхвалим днесь, вернии, Евфросинию; сия бо княжна, дом отчий оставльши и во иночестве поживши добре, многия управила есть ко спасению; во Иерусалиме плотию преставльшися, во Иерусалим горний духом преселися и тамо присно за ны молится. Ейже тако возопиим:

Радуйся, Евфросиние, невесто Христова всечестная.

## ***Икос 1***

Ангельски поживши, преподобная, постническим житием угодила еси Христу и небесныя радости причаститися сподобилася еси по скончании. Темже с горних высот призри на ны, тако тя величающия:

Радуйся, Российския земли похвало; радуйся, отрасли славная от рода Владимира равноапостольнаго. Радуйся, именитых родителей чадо богоизбранное; радуйся, голубице непорочная. Радуйся, девственнице чистая; радуйся, инокиням утешение. Радуйся, ко Иерусалиму небесному путеводительнице; радуйся, благочестия звездо. Радуйся, заступнице к тебе притекающих; радуйся, целительнице недугов незримая. Радуйся, ходатаице за ны теплая.

Радуйся, Евфросиние, невесто Христова всечестная.

## ***Кондак 2***

Видение бе радостное, егда по рождении твоём принесоста ты, преславная, родителя твоя во храм Господень: тамо бо в купели Крещения от первороднаго греха омылася еси погружением, и мира священным помазанием ты, яко отрасль младую, иерей привил есть ко Христу, да поеши Ему выну со избранными Его: Аллилуия.

## ***Икос 2***

Разумом, свыше просвещенным, и чистым сердцем Христови от юности вручила еси себе, Предиславо, почасту во храм притекаючи, в горнице во трудех присно пребывала еси. Темже ты ублажаем:

Радуйся, Христови обрученная от купели крещения; радуйся, миром благодатным запечатленная. Радуйся, Духа Свята вместилище чистое; радуйся, Тем умудренная во спасение. Радуйся, во благое свыше укрепленная; радуйся, разум просветившая молитвою. Радуйся, совесть стяжавшая крепкую во благом; радуйся, от младости уведевшая пути благочестия. Радуйся, уклонилася бо еси пути гибельнаго; радуйся, трудолюбивая отроковице. Радуйся, юных дев российских красото.

Радуйся, Евфросиние, невесто Христова всечестная.

## ***Кондак 3***

Силою Вышняго укрепленная, возлюбила еси, преподобная, научение книжное и тому прилежала еси; мудрость же книжную постигши, паче прочих божественныя книги избрала еси, и яже умудрити могут во спасение всякаго человека, усердно

почитала еси, сладце поющи Господеви: Аллилуия.

### ***Икос 3***

Имать днесь обитель твоя отроковицы многи и млады, научению книжному zde вданныя. Сего ради усердно молим тя, всехвальная, призри на тыя и умудри я во спасение, да ты величаем:

Радуйся, ключ мудрости взыскавшая; радуйся, яко художество книжное постигла еси от младости. Радуйся, тем отверзшая двери богопознания; радуйся, Священное почитавшая Писание. Радуйся, от сего узревшая мира сущаго сотворение; радуйся, умиленная неизреченным Христовым снизхождением к падшему роду нашему. Радуйся, возлюбившая возлюбльшаго нас Господа; радуйся, Тому Единому поработати возжелевшая. Радуйся, последи в чертог славы Его всельшаяся; радуйся, девственнице, юным девам незримая споспешнице в научении. Радуйся, светильнице благочестия и знания.

Радуйся, Евфросиние, невесто Христова всечестная.

### ***Кондак 4***

Бури житейских бед и напастей бежавши, преподобная, паче брака честна житие девственное возлюбила еси и от именитых женихов уклонилася еси, отроковице, да единому Жениху Небесному Христу поработаеши, поющи Ему: Аллилуия.

### ***Икос 4***

Слышала еси, преподобная, яже апостол рече: Глаголю безбрачным и вдовицам – добро им есть, аще пребудут, якоже и аз; аще ли жени, да посягают; не

оженивый бо ся печется, како угодити Господеви, – и сему поревновала еси. Темже ты величаем:

Радуйся, девственнице чистая; радуйся, путь иноческаго жития избравшая. Радуйся, яко жребий девства прияти и вместити возмогла еси Божиею благодатию; радуйся, мирскаго треволнения избегшая. Радуйся, тихаго пристанища взыскавшая; радуйся, Марии Лазареве подражавшая. Радуйся, яко во храме, аки при ногу Христову, приметалася еси; радуйся, яко лику мучениц и преподобных жен приобщилася еси. Радуйся, презревшая лепоту мира тленнаго; радуйся, неизреченныя радости в мире горнем днесь причастнице. Радуйся, праведнаго жития образе.

Радуйся, Евфросиние, невесто Христова всечестная.

### ***Кондак 5***

Бога точию боящися, не утрашилася еси, Евфросиние, тяготы жития иноческаго, кров же оставльши отчий, во обитель притекла еси и облеци ты во ангельский образ умильне игумению молила еси, да не обязавшися куплями житейскими, выну пети сподобишися Христови: Аллилуия.

### ***Икос 5***

Врача Небеснаго молила еси, всехвальная, да скорбь, родителема твоима отшествием учиненная, на радость преложится; оставила бо еси я, преподобная, да Христови послужиши за рождших ты молишися. Темже ты хвалим достойно:

Радуйся, избраннице Божия; радуйся, тайне, из отчаго дома отшедшая. Радуйся, во обитель

всельшаяся княгини Романовы; радуйся, возложшая руку на рало делания духовнаго. Радуйся, брачный венец отложившая; радуйся, главу покрывшая кукулем незлобия. Радуйся, одеждам брачным одежду нищеты предпочетшая; радуйся, со приятием вервицы<sup>1</sup>, аки мечем, вооруженная словом Божиим. Радуйся, крест Христов, аки знамя веры, приимшая; радуйся, яко не посрами тя Господь во уповании. Радуйся, родителя бо, пришедшая тя видети, от Писания тобою утешившася, в радости возвратистася. Радуйся, Евфросиние, невесто Христова всечестная.

### ***Кондак 6***

Проповедника Павла, иже рече: всяк подвижаяся от всех да воздержится, – послушающи, в посте и воздержании неослабно пожила еси, преподобная, во обители; суесловия бо бегала еси и песньми псаломскими назидаяущися молилася еси, и в добрем изволении утверждающися, выну пела еси: Аллилуия.

### ***Икос 6***

Возсия благодать в подвизах жития твоего, Евфросиние всечестная: по некоем бо времени во град Полоцк преселилася еси, и при храме святыя Софии в клетце мале подвижаяущися, книги божественныя преписовала еси и тако град ти присный полезным учением напаяла еси, слышащи от всех таковая:

Радуйся, Полоцкое радование; радуйся, девам сияние. Радуйся, звездо благочестия; радуйся,

---

<sup>1</sup> Вервица – четки у монахов и монахинь.

смирения исполненная. Радуйся, послушанием утвержденная; радуйся, с молчанием скорби терпевшая. Радуйся, при храме бо, яко древле Богоотроковица, пожила еси; радуйся, мудрая княжно и инокине пречестная. Радуйся, цвете постничества; радуйся, свете кротости. Радуйся, упования неложного исповеднице.

Радуйся, Евфросиние, невесто Христова всечестная.

### *Кондак 7*

Хотяй спасти тобою жены и девы многия во иночестве, Владыка Христос сицеваго видения удостои тя, преподобная: в соннем видении узрела еси себе, Евфросиние, принесену в Сельце к церквице Спасове, и Ангела ти рекшаго: Зде ти быти подобает. Ты же абие от сна воставши, радостне пела еси: Аллилуия.

### *Икос 7*

Новое чудо бысть: тойже бо Ангел явился святителю Илии, повеле ему дати Сельце то на вселение ти и церквицу на молитву, еже и сотвори святитель абие. Сия поминающе, тако тя величаем:

Радуйся, ангельски пожившая; радуйся, Ангела Господня узревшая. Радуйся, сладкия беседы его причастнице; радуйся, яко и пред святителем ходатай бе о тебе. Радуйся, Ангелом и на всех путех твоих храненная; радуйся, кровом крил его огражденная. Радуйся, не преткнувшая ноги твоя о камень гордыни; радуйся, сего ради видения зрака ангельского удостоенная. Радуйся, яко явися ти, иже зрит лице Отца нашего Небеснаго; радуйся, не

прогневлъшая хранителя ничимже суетным и греховным. Радуйся, сего ради радостныя вести удостоенная.

Радуйся, Евфросиние, невесто Христова всечестная.

### *Кондак 8*

Странник, кров узрев, радуется и, пришед, покой си приемлет. И ты, преподобная, радости исполнилася еси, при церквице на Сельце водворившия со единою от инокинь, и ту основание обители твоея сотворила еси отнюдуже Богови днесь возносится песнь великая, в вышних сугубо песнословимая: Аллилуия.

### *Икос 8*

Вся весть Господь, и ничтоже тайно, еже не открыется; ведый же вся коемуждо от человек изволение дарует, да изберет кийждо путь жития, и якоже кто поживет, по житию коегождо скончавшася судит. Яже памятующе, тако тя хвалим:

Радуйся, благий ярем Христов подъемшая; радуйся, по гласу ангельскому на место пустынно отшедшая. Радуйся, точию книги с собою принесшая; радуйся, со едином одеянием бывшая. Радуйся, с тремя малыми хлебы всельшаяся; радуйся, прочая вся оставльшая. Радуйся, пустыни украшение; радуйся, яко сроднии на подвиг сей благословиша тя. Радуйся, епископом Илиею утешенная; радуйся, яко вскоре к тебе многи инокини стекошася. Радуйся, яко и обитель славная ту устроися.

Радуйся, Евфросиние, невесто Христова всечестная.

## *Кондак 9*

Всемилостиваго Спаса храм во обители создала еси и честными иконами украсила еси, преподобная, споспешествующей ти благодати Божией; древодела бо на строение церковное некий глас буждаше, на скончание же храма дивне плинфы многи обретошася; яже зрящи, со умилением пела еси: Аллилуия.

## *Икос 9*

Вития мудрая была еси, преподобная, памятовала бо еси слово Христово: иже сотворит едину заповедей сих малых и научит тако человеки, сей велий наречется в Царствии Небеснем, – и поучающи благочестию сестры своя, первее сия творила еси. Темже тя величаем:

Радуйся, инокиням правило иноческаго жития; радуйся, яко в чистоте и целомудрии блюла еси юныя. Радуйся, неложно старья почитавшая; радуйся, скорбным споспешнице в терпении. Радуйся, была бо еси всем образ смирения и благолепнаго хождения; радуйся, обличительнице осуждения и многословия. Радуйся, приятелище дара прозрения сердец; радуйся, вопрошающим мудрая советнице. Радуйся, миротворице сварящихся; радуйся, добродетельми преукрашенная. Радуйся, великая российская дево.

Радуйся, Евфросиние, невесто Христова всечестная.

## *Кондак 10*

Спасения ради и утешения Ефесскую икону Владычицы нашея Богородицы испросила еси из



Царяграда, преподобная, во град Полоцк. Обитель ину устроивши, тою иконою сию украсила еси; сестру же и две дщери братния, Кирианну и Ольгу, иночества обеты Христови обручила еси и во обителях твоих во спасение управляла еси многия, поющи: Аллилуия.

### *Икос 10*

Стеною крепкою от искушений явился смирение твое; вся бо ти повеленная совершивши, яко рабу неключиму вменила еси себе, преподобная; кротостию и тихостию нрава паче злата и бисера украсила еси душу твою. Темже тя величаем:

Радуйся, слуго чистая Девы Пречистыя; радуйся, увеселила бо еси Полоцк чудным Божию Матере образом. Радуйся, великое сокровище Российской земли тако стяжавшая; радуйся, многия девы во обитель Божию Матере приведшая. Радуйся, присныя ти на путь спасения привлекшая; радуйся, мудрая управительнице во спасение. Радуйся, две обители, яко свечи возжегшая; радуйся, теми просветившая страну Полоцкую. Радуйся, насадительнице древа иноческаго жития; радуйся, смирением утаевавшая высоту твоих подвигов. Радуйся, строительнице Российской земли.

Радуйся, Евфросиние, невесто Христова всечестная.

### *Кондак 11*

Песньми восхваляюще тя, терпению твоему дивимся, преподобная, всякия бо труды и скорби понесши, последи во Святую Землю странствие прияла еси, идеже, по желанию твоему, и скончатися

приводе ти Господь; тамо бо к Нему в старости маститей преселилася еси, подвиг добрый совершивши, с песнию: Аллилуия.

### *Икос 11*

Светозарная луча земли Российския! Аще плотию преставилася еси от нас, преподобная, обаче духом с нами присно пребываеши. Во храме, тобою созданном, молящися и кресту, от тебе устроену, покланяющися, молим тя, прими от нас сицевыя хвалы:

Радуйся, древняя России сияние; радуйся, оныя днесь великия похвало. Радуйся, славная Земли Святыя от севера пришельнице; радуйся, гробу Христову поклонитися сподобльшаяся. Радуйся, лампаду ту от земли Российския возжегшая; радуйся, у гроба Христова ко Христу отшедшая. Радуйся, у онаго крест земнаго жития твоего оставльшая; радуйся, Святыми Тайнами при скончании напутствованная. Радуйся, на небеси от святых угодник радостно сретенная; радуйся, венцем славы от Небеснаго Жениха увенчанная. Радуйся, мудрая дево, вшедшая в чертог Жениха Небеснаго со славою.

Радуйся, Евфросиние, невесто Христова всечестная.

### *Кондак 12*

Благодати причастнице, усердно молим тя, Евфросиние всехвальная, пролий теплую твою молитву ко Всевышнему за всю землю нашу православную, да мудростию и чистотою жития народнаго, яко дщерь избранная, будет во языцех земля наша, и чада ея да внидут в горняя селения,

поюще Богови: Аллилуия.

### *Икос 12*

Поюще тя, яко заступницу нашу теплую, инокиням же и девам обители твоея покров и утверждение, радуемся о тебе, преподобная, и молитвами твоими просимая приемлюще, с любовию величаем тя сице достойно:

Радуйся, яко мощи твоя, во Отечество принесенныя, процветоша нетлением; радуйся, всехвальная, равноапостольнаго Владимира правнуко. Радуйся, собеседнице равноапостольныя Ольги и всего благосветлаго лика праведных жен; радуйся, всельшаяся в скинию святых. Радуйся, незримая о нас ходатаице; радуйся, болящих врачевание дивное. Радуйся, печальных утешение неложное; радуйся, отрадо скорбящих. Радуйся, опоро тя призывающих; радуйся, заступнице наша теплая у Христа. Радуйся, дивная, верою чтущих тя путеводительнице ко спасению.

Радуйся, Евфросиние, невесто Христова всечестная.

### *Кондак 13*

О всехвальная мати наша Евфросиние всечестная! Моли за ны Господа и Матерь Его Пречистую, да укрепит наша немощныя силы и во спасение управит, юныя в чистоте соблюдет, девствующия укрепит в подвизе, во браце сущия в любви и мире усовершит, уврачуует недужныя, просветит омраченныя, умершия простит и вся в чертоги Своя управит, идеже выну Ангели поют песнь хвалебную: Аллилуия.

*(Этот кондак читается трижды, затем икос 1 и кондак 1)*

### ***Икос 1***

Ангельски поживши, преподобная, постническим житием угодила еси Христу и небесныя радости причаститися сподобилася еси по скончании. Темже с горних высот призри на ны, тако тя величающия:

Радуйся, Российския земли похвало; радуйся, отрасли славная от рода Владимира равноапостольнаго. Радуйся, именитых родителей чадо богоизбранное; радуйся, голубице непорочная. Радуйся, девственнице чистая; радуйся, инокиням утешение. Радуйся, ко Иерусалиму небесному путеводительнице; радуйся, благочестия звездо. Радуйся, заступнице к тебе притекающих; радуйся, целительнице недугов незримая. Радуйся, ходатаице за ны теплая.

Радуйся, Евфросиние, невесто Христова всечестная.

### ***Кондак 1***

Избранную Христову невесту песньми восхвалим днесь, вернии, Евфросинию; сия бо княжна, дом отчий оставльши и во иночестве поживши добре, многия управила есть ко спасению; во Иерусалиме плотию преставльшися, во Иерусалим горний духом преселися и тамо присно за ны молится. Ейже тако возопиим:

Радуйся, Евфросиние, невесто Христова всечестная.

### ***Молитва***

О преподобная и приснопамятная, всехвальная мати Евфросиние, Ангеле во плоти, Богоизбранный сосуде Святаго Духа, Церкви Христовы похвало и

украшение, монашествующих славо и утверждение, Отечеству, обители твоей и всей стране Российской помощи, покрове и защитнице! Ты еси, яко древо, насажденное при исходящих вод, плоды добродетелей твоих и благодатными дарованиями Святаго Духа украшенная, наставнице делом и словом, избранная, непорочная и добрая.

Услыши ны, молящаяся тебе и призывающая имя твое, имаши бо дерзновение у Господа. Испроси нам преуспеяние в жизни добродетельней, огради сердца наша верою, надеждою и любовью и страхом Божиим. Подай нам помощь в трудах и скорбех наших и, якоже попечение имела еси в житии твоём о обители твоей и иночествующих, тако и ныне потщися о нас, благопоспешити нам во всем, и обитель твою огради миром и защити от враг видимых и невидимых, да преуспеваает и процветает в добродетелех. Изми ны от всякия нужды и тесноты, от лютых болезней и от нечаянныя смерти и приведи ны ко истинному покаянию при исходе из жизни сея; испроси нам у Господа Бога кончину мирну, безболезненну, непостыдну, Святых Таин причастну и преведи ны чрез мытарства воздушная, да не похитят нас истязателие грознии по грехом нашим, но да твоим заступлением я помощью возможем безбедно прейти истязание воздушное, и милость получитьи, и предстати неосужденно страшному Престолу, и на Страшнем Судищи сподобитися одесную стати Праведнаго Судии, и наследовати праведных часть. Ей, госпоже, всечестная мати, преподобная Евфросиние, помози нам молитвами твоими, огради

нас и заступи от всяких козней вражиих, да сподобимся прейти время жизни сея непреткновенно и спасение получитьи молитвами твоими у Христа Господа, Егоже и сподобимся пети и славословити со Безначальным Отцем и со Святым Духом во веки веков. Аминь.